



Oifig an Choimisinéara Teanga

Tuarascáil faoi fho-alt 26(5) d'Acht na dTeangacha Oifigiúla,
2003

do Thithe an Oireachtais

maidir le

cur i bhfeidhm moltaí imscrúdaithe a rinneadh faoi fho-alt 21(c)
d'Acht na dTeangacha Oifigiúla, 2003

Oifig na nOibreacha Poiblí

Nollaig 2013

CLÁR

- CAIBIDIL 1** – Cúlra
- CAIBIDIL 2** – Achoimre ar na hImscrúdaithe
- CAIBIDIL 3** – An Próiseas Iniúchta
- CAIBIDIL 4** – An Chéad Chéim Eile
-
- AGUISÍN A** – Tuarascáil Imscrúdaithe
- AGUISÍN B** – Comhfhreagras ó Oifig na nOibreacha Poiblí maidir le cur i bhfeidhm mholtaí an imscrúdaithe

CAIBIDIL 1 – Cúlra

I gcomhréir le fo-alt 26(5) d'Acht na dTeangacha Oifigiúla, 2003, ceadaítear dom mar Choimisinéir Teanga tuarascáil a chur faoi bhráid gach Tí den Oireachtas má mheasaim nár chuir comhlacht poiblí i ngníomh aon chuid de na moltaí i dtuarascáil ar imscrúdú a rinne mé.

Baineann an tuarascáil seo le himscrúdú a rinne m'Oifig ar Oifig na nOibreacha Poiblí agus a tugadh chun críche le linn na bliana 2011. Ba é an bealach a léiríonn Oifig na nOibreacha Poiblí a hainm ar stáiseanóireacht agus comharthaíocht ab ábhar don imscrúdú sin. Tá an tuarascáil imscrúdaithe sin le fáil mar **AGUISÍN A** leis an tuarascáil seo.

Tar éis tréimhse réasúnach ama a bheith caite agus fiosruithe cuí déanta agam, tá mé tagtha ar an tuairim nach bhfuil na moltaí a rinneadh san imscrúdú sin curtha i ngníomh go sásúil ag Oifig na nOibreacha Poiblí.

Tá sé de dhualgas ormsa mar Choimisinéir Teanga gach beart riachtanach, atá faoi réim m'údaráis, a dhéanamh chun a chinntiú go gcomhlíonann comhlachtaí poiblí forálacha Acht na dTeangacha Oifigiúla, 2003. Chomh maith leis sin, tá sé d'údarás agam imscrúdú a dhéanamh chun a fháil amach ar chomhlíon comhlacht poiblí forálacha d'aon achtachán eile a bhaineann le stádas nó le húsáid teanga oifigiúil.

In aon chás ina n-eisítear tuarascáil imscrúdaithe, meabhraítear go bhféadfaidh páirtí san imscrúdú nó aon duine eile a ndéanann fionnachtana agus moltaí an imscrúdaithe sin difear dó nó di, achomharc a dhéanamh chuig an Ard-Chúirt ar phone dlí i gcoinne an chinnidh. Ní dhearnadh a leithéid d'achomharc i gcás an imscrúdaithe is ábhar don tuarascáil seo.

Tar éis tréimhse réasúnach ama a bheith caite, is gnách le m'Oifig scrúdú a dhéanamh ar an mbealach ina gcuireann na comhlachtaí poiblí na moltaí a d'eascair as aon imscrúdú i bhfeidhm. Tríd an bpróiseas seo, tugtar deis don chomhlacht poiblí cuntas a thabhairt ar an mbealach inar cuireadh moltaí an imscrúdaithe i ngníomh.

Le linn na bliana 2012, rinne m'Oifig iniúchadh ar an mbealach ina raibh Oifig na nOibreacha Poiblí ag tabhairt faoi chur i bhfeidhm mholtaí an imscrúduithe is ábhar don tuarascáil seo. Le linn an phróisis sin, dheimhnigh Oifig na nOibreacha Poiblí do m'Oifig nach raibh na moltaí a bhí déanta agam sa tuarascáil imscrúdaithe curtha i ngníomh. Is ar an mbonn sin atá an tuarascáil seo á cur faoi bhráid gach Tí den Oireachtas.

CAIBIDIL 2 – Achoimre ar an Imscrúduit

Leagann fo-alt 21(a) d'Acht na dTeangacha Oifigiúla dualgas orm faireachán a dhéanamh ar an mbealach ina gcomhlíonann comhlachtaí poiblí forálacha an Achta. Mar chuid de chomhlíonadh na feidhme sin, rinne m'Oifig iniúchadh ar chur i bhfeidhm scéim teanga Oifig na nOibreacha Poiblí. Le linn na hoibre sin, tugadh faoi deara gur chosúil nach raibh Oifig na nOibreacha Poiblí ag cloí leis na forálacha reachtúla atá déanta i dtaca le húsáid teangacha oifigiúla ar stáiseanóireacht agus comharthaíocht (I.R. Uimh. 391 de 2008). Níor ghlac Oifig na nOibreacha Poiblí leis, áfach, gur sháraigh sí na Rialacháin sin atá déanta faoi fho-alt 9(1) d'Acht na dTeangacha Oifigiúla.

Éilíonn na Rialacháin luaite nach mór do cheannteidil stáiseanóireachta agus comharthaíocht de chuid na gcomhlachtaí poiblí a thagann faoi scáth Acht na dTeangacha Oifigiúla a bheith i nGaeilge, nó i nGaeilge agus i mBéarla. I gcás go roghnaíonn comhlacht poiblí dhá theanga oifigiúla an Stáit a úsáid ina chuid stáiseanóireachta agus comharthaíochta, sonraítear sna Rialacháin leagan amach áirithe maidir le feiceálacht, inléiteacht, méid cló, eolas agus eile nach mór cloí leis. Déantar foráil ar leith go mbeidh tús áite ag an nGaeilge, i.e. go mbeidh an téacs i nGaeilge ann ar dtús.

I gcás Oifig na nOibreacha Poiblí, bhí tús áite tugtha d'ainm an chomhlachta phoiblí i mBéarla ar stáiseanóireacht agus ar chomharthaíocht nua.

Ní ceadmhach d'Oifig an Choimisinéara Teanga leasú ná maolú ar bith a dhéanamh ar na forálacha reachtúla agus is é gnó na hOifige seo a chinntiú go gcloíonn comhlachtaí poiblí leo. Dá nglacfaí leis nár ghá cloí leis i gcás Oifig na nOibreacha Poiblí, bheifí ag bunú fasaigh nár ghá cloí leis in aon chomhlacht poiblí eile.

Níor ghlac mé leis an argóint a rinne Oifig na nOibreacha Poiblí gur dlúthchuid de ghrafaic nó léaráid lógó na hOifige a bhí in ainm an chomhlachta phoiblí agus go raibh sé saor ó riachtanais reachtúla teanga dá bharr sin de réir díolúine a bhí ceadaithe i bhfo-alt 91)(b)(iv) de na Rialacháin. Níor ghlac mé leis an argóint sin mar go raibh foráil sna Rialacháin a thug díolúine ó na dualgais reachtúla teanga d'ainm comhlachta ach amháin sa chás gur comhlacht poiblí a bhí i gceist.

Cé go bhfeicfí do dhaoine áirithe gur mionphointe é seo, tá tábhacht leis mar fhasach agus le cinntiú nach ndéanfaí léirmhíniú míchruinn ar an díolúine a

cheadaítear faoi na Rialacháin leis an nGaeilge a fhágáil ar lár ar fad in ainmneacha comhlachtaí poiblí ar chomharthaíocht agus stáiseanóireacht.

Tá tábhacht eile leis an léirmhíniú seo ó tharla é a bheith de chúram ar Oifig na nOibreacha Poiblí comharthaíocht a sholáthar do chuid mhór comhlachtaí poiblí ar fud na tíre. Ní mór go mbeadh léirmhíniú cruinn ag an eagraíocht sin ar na forálacha reachtúla teanga agus iad i mbun chomhlíonadh a gcuid cúraimí.

Sna moltaí a rinne mé sa tuarascáil imscrúdaithe, theastaigh uainn go gcloífeadh Oifig na nOibreacha Poiblí leis na forálacha reachtúla feasta. Ag an am céanna, theastaigh uaim a bheith airdeallach nach gcuirfí aon chostas breise ar an eagraíocht lena ngéilliúlacht do na dualgais a chinntiú. Ar an gcúis sin mhol mé go n-ídeofaí an stoc reatha den stáiseanóireacht neamhghéilliúil agus go ndéanfaí na leasuithe cuí a thabhairt i bhfeidhm i gcás stáiseanóireacht nua agus comharthaíocht nua a d'ordófaí.

CAIBIDIL 3 – An Próiseas Iniúchta

Tar éis do thréimhse réasúnach ama a bheith caite ón am a n-eisítear aon tuarascáil imscrúdaithe, scrúdaíonn m’Oifig an bealach ina bhfuil an chomhlacht poiblí ag tabhairt faoi fhorfheidhmiú mholtaí an imscrúdaithe. Le linn an phróisis seo, tugtar deis don chomhlacht poiblí freagra oifigiúil a chur ar fáil maidir leis na céimeanna a glacadh go dtí sin chun moltaí an imscrúdaithe a chur i ngníomh.

Scríobh an Oifig seo chuig Oifig na nOibreacha Poiblí i mí Lúnasa 2012 agus lorgaíodh mionsonraí maidir leis an mbealach ina raibh na moltaí a bhí déanta sa tuarascáil imscrúdaithe á gcur i bhfeidhm. Tugadh freagra ar an gcumarsáid sin i mí Dheireadh Fómhair 2012 agus tá cóip den chomhfhreagra sin le fáil in **Aguisín B**.

Sa fhreagra a cuireadh ar fáil do m’Oifig ba léir nach raibh na moltaí substaintiúla a rinne mé sa tuarascáil imscrúdaithe curtha i bhfeidhm ag Oifig na nOibreacha Poiblí. Mhaígh Oifig na nOibreacha Poiblí an athuair gur cuid dhílis den lógó a bhí in ainm an chomhlachta poiblí agus go raibh comhairle faighte aici ó Oifig an Ard-Aighne a thacaigh leis an tuairim sin. Thug Oifig na nOibreacha Poiblí le fios chomh maith go raibh cuireadh faighte aici ó Ard-Rúnaí na Roinne Ealaíon, Oidhreacht agus Gaeltachta i mí na Samhna 2011 tuairimí a chur ar fáil i dtaca leis an athbhreithniú a bhí á dhéanamh ar Acht na dTeangacha Oifigiúla, 2003. Mar chuid den phróiseas comhairliúcháin sin, thug Oifig na nOibreacha Poiblí le fios go raibh iarrtha aici go dtabharfaí sainmhíniú soiléir ar lógó sa reachtaíocht agus go gcuirfí díolúine ar fáil i gcás trádmarcanna, go háirithe trádmarcanna a bhí cláraithe roimh theacht i bhfeidhm an Achta.

I dtuarascáil an imscrúdaithe bhí diúltaithe agam roimhe sin don argóint gur cuid dhílis den lógó a bhí in ainm an chomhlachta poiblí. Ní ghlacaim leis ach an oiread gur leor aighneacht atá déanta i ndáil le próiseas comhairliúcháin poiblí mar bhunús gan moltaí reachtúla a chur i ngníomh.

I gcás aon tuarascáil imscrúdaithe a eisím bíonn deis ag na páirtithe san imscrúdú nó aon duine eile a ndéanann mo chuid fionnachtana agus moltaí difear dó nó di achomharc a dhéanamh chun na hArd-Chúirte ar phonc dlí i gcoinne mo chinnidh. Níor ghlac Oifig na nOibreacha Poiblí leis an deis sin, ach ag an am céanna níor cuireadh na moltaí reachtúla a bhí déanta agam i ngníomh.

CAIBIDIL 4 – An Chéad Chéim Eile

Tá sé de chúram ormsa mar Choimisinéir Teanga gach beart riachtanach atá faoi réim m'údaráis a dhéanamh chun a chinntiú go gcomhlíonfaidh comhlachtaí poiblí forálacha faoi Acht na dTeangacha Oifigiúla. Déanaim an méid seo trí fhaireachán a dhéanamh ar chomhlachtaí poiblí, comhairle a chur ar an bpobal maidir lena gcearta faoin Acht agus comhairle a sholáthar do chomhlachtaí poiblí maidir lena n-oibleagáidí faoin Acht.

Nuair a fheictear dom go bhféadfadh faillí a bheith á déanamh ag comhlachtaí poiblí i gcomhlíonadh a ndualgas faoin Acht nó faoi fhorálacha aon achtacháin eile a bhaineann le stádas nó le húsáid na Gaeilge, tá sé de chumhacht agam imscrúdú a thionscnamh ar an ábhar.

Bíonn fionnachtana agus moltaí ina gcuid d'aon tuarascáil a eisím i ndiaidh dom imscrúdú a thabhairt chun críche. Titeann an fhreagracht ar an gcomhlacht poiblí na moltaí sin a chur i bhfeidhm laistigh de thréimhse réasúnach ama nó laistigh d'amchlár sonrach a bhíonn leagtha síos i moltaí an imscrúdaithe. Tá sé de rogha agus de cheart ag aon pháirtí in imscrúdú faoin Acht, nó aon duine eile a ndéanann mo chuid fionnachtana agus moltaí tar éis imscrúdú den sórt sin difear dó nó di, achomharc a dhéanamh chuig an Ard-Chúirt ar phonc dlí.

I gcás an imscrúdaithe is ábhar don tuarascáil seo, ní dhearnadh a leithéid d'achomharc.

Tar éis thréimhse réasúnach ama a bheith caite ón am ar eisíodh tuarascáil an imscrúdaithe seo, scrúdaigh m'Oifig an bealach ina raibh na moltaí éagsúla á gcur i bhfeidhm ag Oifig na nOibreacha Poiblí. Le linn an phróisis seo, tugadh deis don chomhlacht poiblí freagra a bhreithniú i leith an bhealaigh inar cuireadh na moltaí i ngníomh. Tá cóip den fhreagra sin mar aguisín leis an tuarascáil seo.

Tar éis dom an cas a athbhreithniú ina iomláine, feictear dom nach bhfuil moltaí an imscrúdaithe curtha i bhfeidhm go sásúil ag Oifig na nOibreacha Poiblí agus nach féidir liomsa, faoi réir na gcumhachtaí atá tugtha dom, aon chéim bhreise a ghlacadh chun a chur ina luí orthu an méid sin a dhéanamh.

Is ar an mbonn sin a leagam an tuarascáil seo faoi bhráid gach Tí den Oireachtas.

Is ar Thithe an Oireachtais a thiteann sé anois aon chéimeanna breise a thógáil, má mheastar gur cuí sin a dhéanamh.

AGUISÍN A

Tuarascáil faoi alt 26 d’Acht na dTeangacha Oifigiúla 2003 ar

Imscrúdú faoi fho-alt 21(c) d’Acht na dTeangacha Oifigiúla 2003

Oifig na nOibreacha Poiblí

IM-232A

Ábhar an Imscrúdaithe

An bhfuil sárú á dhéanamh ag Oifig na nOibreacha Poiblí ar na dualgais reachtúla teanga atá daingnithe i bhfo-ailt 7(1)(a) agus 7(2)(a) d’Ionstraim Reachtúil (I.R. Uimh. 391 de 2008) – [Na Rialacháin um Acht an dTeangacha Oifigiúla 2003 (ALT 9) 2008] fad is a bhaineann sé leis an téacs i nGaeilge a bheith ann ar dtús i gceanntaidil ar stáiseanóireacht an chomhlachta poiblí (ón 1 Márta 2011) agus i gcás comharthaíocht nua a shuítear in aon suíomh ón 1 Márta 2009?

CLÁR

CAIBIDIL 1 – Cúlra	lch 3
CAIBIDIL 2 – Cás Oifig na nOibreacha Poiblí	lch 5
CAIBIDIL 3 – Osradharc Ginearálta ar an Imscrúdú	lch 7
CAIBIDIL 4 – Tuarascáil, Fionnachtana agus Moltaí	lch 13
CAIBIDIL 5 – Achomhairc chuig an Ard-Chúirt	lch 15
CAIBIDIL 6 – Tuairimí á Lorg	lch 16
AGUISÍN A	
AGUISÍN B	

CAIBIDIL 1

Cúlra

Tháinig sé chun solais de thoradh córas faireachán m’Oifige go raibh stáiseanóireacht agus comharthaíocht de chuid Oifig na nOibreacha Poiblí a raibh amhras ann an raibh sé ag teacht leis na forálacha reachtúla maidir le húsáid teangacha oifigiúla.

Tharraing m’Oifig an cheist seo anuas le hOifig na nOibreacha Poiblí le linn an iniúchadh ar chur i bhfeidhm a scéim teanga faoi Acht na dTeangacha Oifigiúla, 2003, ach níor éirí leis an bpróiseas sin an cheist a réiteach.

Theastaigh uaim, de thoradh an imscrúdaithe seo, a shoiléiriú an raibh nó nach raibh Oifig na nOibreacha Poiblí ag sárú na bhforálacha reachtúla sa chás seo.

Go hachomair, leagann na Rialacháin faoi fho-alt 9(1) d’Acht na dTeangacha Oifigiúla dualgas ar chomhlachtaí poiblí i dtaca le húsáid na dteangacha oifigiúla (Gaeilge agus Béarla) ar aon chomharthaí nua a chuirfeadh siad in airde tar éis 1 Márta 2009 agus ar stáiseanóireacht nua nach raibh fós ina seilbh ar an dáta sin. Tá cóip den Ionstraim Reachtuil ina leagtar síos na Rialacháin sin (I.R. Uimh. 391 de 2008) – [Na Rialacháin um Acht an dTeangacha Oifigiúla 2003 (ALT 9) 2008] mar **AGUISÍN A** leis an tuarascáil seo.

Tá údarás agus cumhachtaí reachtúla tugtha dom faoi ailt 21-29 d’Acht na dTeangacha Oifigiúla 2003 le himscrúduithe a sheoladh. Bheartaigh mé tabhairt faoi imscrúdú sa chás mar a cheadaítear dom faoi fho-alt 21(c) den Acht.

Ba é an nós imeachta a bheartaigh mé don chéad chéim den imscrúdú ná litir a sheoladh chuig Cathaoirleach Choimisinéirí na nOibreacha Poiblí, mar cheann an chomhlachta phoiblí, ag lorg eolais ar leith, freagraí ar cheisteanna ar leith chomh maith le haon fhaisnéis, taifid nó rud eile den sórt sin a bhain le hábhar an imscrúdaithe.

D’iarr mé go gcuirfí an t-eolas cuí sin ar fáil faoin 4 Bealtaine 2011 agus thairg mé deis ar shoiléiriú ar aon ghné de riaradh an t-imscrúdú trí theagmháil le m’Oifig. D’aontaigh mé le hiarratas ón eagraíocht síneadh ama a thabhairt lena bhfreagra a ullmhú.

Cuireadh an freagra sin ar fáil i litir a fuair mé ar an 24 Bealtaine 2011. Tá an chumarsáid sin mar **AGUISÍN B** leis an tuarascáil seo.

Tá dualgas orm mar Choimisinéir Teanga in aon chás ina seolaim imscrúdú faoi Acht na dTeangacha Oifigiúla tuarascáil i scríbhinn a ullmhú agus a chur faoi bhráid an chomhlachta phoiblí lena mbaineann, faoi bhráid an Aire Ealaíon, Oidhreacht agus Gaeltachta agus, i gcás ina ndéantar gearán liom, faoi bhráid an ghearánaigh, maidir le fionnachtana an imscrúdaithe. Féadaim aon mholadh is cuí, ag féachaint don imscrúdú, a áireamh sa tuarascáil sin.

Tugadh aird chúil ar a raibh le rá ag Oifig na nOibreacha Poiblí in ullmhú leagan críochnaitheach na tuarascála.

Comhoibriú

Cuireadh an t-eolas a bhí iarrtha san imscrúdú ar fáil go críochnúil agus go gairmiúil dom. Is mór agam an comhoibriú a thug Oifig na nOibreacha Poiblí dom le linn an phróisis imscrúdaithe.

CAIBIDIL 2

Cás Oifig na nOibreacha Poiblí

Sa bhfreagra ó Oifig na nOibreacha Poiblí, atá mar **AGUISÍN B** leis an tuarascáil seo, shéan na Coimisinéirí gur sháraigh siad na rialacháin (I.R. Uimh.391 de 2008) faoi fho-alt 9(1) d’Acht na dTeangacha Oifigiúla i gcás a gceannteideal stáiseanóireachta agus aon chomharthaíocht nua atá acu:

“Ní ghlacann Oifig na nOibreacha Poiblí leis go sáraíonn na ceannteideal ar stáiseanóireachta agus na comharthaí nua atá againn na dualgais reachtúla maidir le húsáid teangacha oifigiúla mar atá daingnithe in Ionstraim Reachtúil Uimhir 391 de 2008 faoi fho-alt 9(1) d’Acht na dTeangacha Oifigiúla 2003.”

Mar shoiléiriú ar seo, bhí an méid seo le rá ag Oifig na nOibreacha Poiblí:

“De réir alt 7 den Ionstraim reachtúil Uimhir 391 de 2008 beidh feidhm ag na forálacha seo a leanas maidir le stáiseanóireacht agus comharthaí agus (mar a fheiceann tú thuas i gcás stáiseanóireacht) tá na forálacha sin ar fad curtha i bhfeidhm ar stáiseanóireacht agus ar chomharthaí na hOifige seo.

Tá an téacs i nGaeilge ann ar dtús.

Tá an téacs i nGaeilge chomh feiceálach, chomh sofheicthe agus chomh hinléite céanna leis an téacs i mBéarla agus ar an taobh céanna den leathanach lena mbaineann.

Níl na litreacha sa téacs i nGaeilge níos lú, ó thaobh méide de, ná na litreacha sa téacs i mBéarla.

Cuireann an téacs i nGaeilge an fhaisnéis chéanna in iúl leis an bhfaisnéis a chuireann an téacs i mBéarla in iúl.

Níl na focal sa téacs i nGaeilge giorraithe ach amháin má tá an focal sa téacs i mBéarla, ar aistriúcháin air é, giorraithe freisin.”

Thug Oifig na nOibreacha Poiblí an léargas seo a leanas i dtaca le hábhar na himscrúduithe:

“Tuigim ónár gcomhráite le foireann d’oifige, go háirithe i dtaca leis an bhfaireacháin a rinneadh ar chur i bhfeidhm ár scéim teanga, gur dearadh lógó na h-oifige atá mar bhunús na h-imscrúduithe. Más ea creidim go láidir go bhfuil díolúine ón reachtaíocht i gceist anseo. De réir ailt 9.1 (b) (ii) agus (iii) ní fhorléireofar aon ní sna Rialacháin seo mar ní lena gceanglaítear ar chomhlacht poiblí aistriúchán a dhéanamh ó theanga oifigiúil amháin go dtí an teanga oifigiúil eile i gcás na nithe seo a leanas:-

(ii) lógó

(iii) ainm branda

Tuigim ó méad seo mar sin nach bhfuil gá ár lógó a athrú nó a aistriú. Is bunchuid de ghrafaic nó léaráid lógó na hoifige seo an foclaíocht atá leis. Scríobh mé chuig Oifig Príomh-Aturnae an Stáit ag lorg comhairle faoin gceist agus chuaigh an Oifig sin chuig Oifig an Ard-Aighne chun comhairle a lorg. Is é an comhairle a bhfuarthas ná go mbaineann an díolúine i Rialacháin (9)(1)(b)(ii) d’Acht na dTeangacha Oifigiúla 2003 (Alt 9) Rialacháin 2008 leis an lógó ata cláraithe ag an OOP. Molann Oifig an Ard-Aighne freisin gur ‘Ainm Branda’ an lógó – faoi mír (iii) den alt céanna dos na Rialacháin 2008. Comhairlíonn an Oifig sin nach bhfuil lógó nó ainm branda teoranta d’earraí ach go mbaineann siad le seirbhísí freisin. Tá cóip den comhairle a bhfuarthas leis seo. Ins dteannta sin tá cóip den deimhniú clárúcháin trádmharc ó Oifig na bPaitinní atá i bhfeidhm ó 13 Deireadh Fómhair 1999, a léiríonn gur chuid bhunúsach den lógó an foclaíocht agus nach féidir an foclaíocht mar atá a dheighilt ón lógó.”

CAIBIDIL 3

Osradharc Ginearálta ar an Imscrúdú

Baineann an t-imscrúdú seo leis na Rialacháin atá déanta faoi fho-alt 9(1) d’Acht na dTeangacha Oifigiúla (I.R. Uimhir 391 de 2008).

Daingnítear sna rialacháin má bheartaíonn comhlacht poiblí – ar nós Oifig na nOibreacha Poiblí - dhá theanga oifigiúil an Stáit, Gaeilge agus Béarla, a úsáid ina gcuid stáiseanóireachta agus comharthaíochta go gcloífidh siad le leagan amach áirithe maidir le feiceálacht, inléiteacht, méid cló, eolas agus eile.

Déantar foráil ar leith go mbeidh tús aite ag an nGaeilge, .i. *go mbeidh an téacs i nGaeilge ann ar dtús.*

Ar chomharthaíocht nua agus ar stáiseanóireacht nua Oifig na nOibreacha Poiblí, is léir, tríd is tríd, go bhfuil aird chúil tugtha ar na forálacha reachtúla ach is léir freisin go bhfuil tús áite tugtha d’ainm an chomhlachta poiblí trí Bhéarla áit a bhfuil *The Office of Public Works* (i ndath dearg chun cinn ar an leagan Gaeilge, *Oifig na nOibreacha Poiblí* i ndath gorm.

Déarfaidh daoine áirithe gur mionphointe é seo.

Ach i ndaingniú na bhforálacha reachtúla seo rinne Tithe an Oireachtais cúram ar leith den phointe seo nuair a treoraíodh go mbeidh an téacs i nGaeilge ann ar dtús.

Ní ceadmhach don Oifig seo leasú nó maolú ar bith a dhéanamh ar na forálacha sin agus is é an gnó atá againne ná a chinntiú go gcloíonn comhlachtaí poiblí leo.

Dá nglacfaí leis nár ghá cloí leis i gcás Oifig na nOibreacha Poiblí, bheifí ag bunú fasach nár ghá cloí leis in aon chomhlacht poiblí eile.

Shoiléirigh Oifig na nOibreacha Poiblí don imscrúdú go raibh an eagraíocht sin den tuairim láidir go rabhadar ag cloí go hiomlán agus go cuí leis na forálacha reachtúla. Dhírigh siad ar n-áird ar díolúine áirithe a bhí ceadaithe sna rialacháin:

“De réir ailt 9.1 (b) (ii) agus (iii) ní fhorléireofar aon ní sna Rialacháin seo mar ní lena gceanglaítear ar chomhlacht poiblí aistriúchán a dhéanamh ó theanga oifigiúil amháin go dtí an teanga oifigiúil eile i gcás na nithe seo a leanas:-

- (ii) lógó*
- (iii) ainm branda*

Lógó agus ainm comhlachta poiblí

Rinneadh an argóint gur bunchuid de ghrafaic nó léaráid lógó na hoifige sin an foclaíocht atá leis agus go raibh sé saor ó riachtanais reachtúla teanga dá bharr sin. Ainm an

chomhlachta poiblí i mBearla ar dtús agus ansin i nGaeilge atá i gceist leis an bhfoclaíocht sin.

Níl sáinmhníú ar leith tugtha ar an bhfocal “lógó” chun críche Acht na dTeangacha Oifigiúla nó sna rialacháin atá déanta faoin Acht sin. Da bhrí sin is é an riail forléirithe go bhféachtar ar gnáth bhrí na bhfocal.

Is é an gnáth sainmhíniú atá ar lógó ná siombail, samhail, comhartha, dearadh nó léaráid phictiúrtha a úsáidtear chun aitheantas ar leith a éascú.

Samplaí simplí de lógónna ó chomhlachtaí poiblí nach bhfuil riachtanas a n-aistriú ó theanga amháin go dtí an ceann eile iad seo a leanas ag Bord Soláthar an Leictreachais agus ag Raidió Teilifís Éireann:



D'aontóinn le hOifig na nOibreacha Poiblí nár gha lógó na heagraíochta sin a leasú lena sholáthar i nGaeilge agus i mBéarla de bharr na díolúine sna rialacháin reachtúla teanga. Feictear domsa áfach nach cuid den lógó sa chás seo ainm iomlán an chomhlachta poiblí atá i dteannta an lógó agus tá foráil ar leith reachtúil déanta sna rialacháin ina leith sin.

Creidim gurbh é seo a leanas lógó Oifig na nOibreacha Poiblí



agus ó tharla an díolúine a bheith ceadaithe faoi na rialacháin, ní gá é sin a sholáthar sa dhá theanga oifigiúil.

Ina theanta sim, tá ainm iomlán an chomhlachta poiblí tugtha mar seo:

The Office of Public Works
Oifig na nOibreacha Poiblí

Ní chreidim go mbaineann díolúine le hainm iomlán an chomhlachta poiblí sin de bharr na forála i bhfo-alt alt 9(1) (b)(iv) de na rialacháin.

“Ní fhoréileofar aon ní sna Rialacháin seo mar ní lena gceanglaítear ar chomhlacht poiblí—

(b) aistriúchán a dhéanamh ó theanga oifigiúil amháin go dtí an teanga oifigiúil eile i gcás na nithe seo a leanas—

(iv) ainm comhlachta (seachas comhlacht poiblí).”


[Aibhsiú déanta anseo].

Is léir dom go ndearnadh machnamh ar an gceist seo maidir le hainmneacha comhlachta poiblí nuair a bhí na rialacháin seo á mbeartú agus á ndaingniú. Rinneadh eisceacht nó díolúine i gcás gach cineál comhlachta eile ach amháin comhlachtaí poiblí.

Mura bhfuil eisceacht nó díolúine i gceist i gcás ainm chomhlachta poiblí is ceart go mbeadh dhá theanga oifigiúil an stáit in úsáid ina gcuid stáiseanóireachta agus

comharthaíochta agus go mbeadh an úsáid sin faoi réir ag na rialacháin, san áireamh an fhoráil go mbeadh an téacs i nGaeilge ann ar dtús.

Samplaí de lógónna agus ainmneacha chomhlacht poiblí á úsáid go cuí i gcomhréir leis na rialacháin iad na samplaí seo a leanas:



Díol spéise don imscrúdú é go raibh faisnéis tacaíochta ó dhá chomhlacht poiblí eile i dteannta freagra Oifig na nOibreacha Poiblí chuig an imscrúdú, mar atá Oifig an Ard-Aighne agus Oifig na bPaitinní. Maidir le ceannteideal stáiseanóireachta agus ainmneacha na gcomhlachtaí poiblí sin ar an gcomhfhreagras a chuireadh faoinar mbráid, bhí tús áite ag an nGaeilge i ngach cás i gcomhréir leis an bhforáil in Alt 7 den na rialacháin.

Lógó Cláraithe?

Tagraítear do lógó Oifig na nOibreacha Poiblí a bheith “cláraithe.” Ní léir dom go bhfuil aon chóras ann sa tír seo le lógónna astú féin a chlárú go hoifigiúil mar lógónna.

Cuireadh faisnéis ar fáil don imscrúdú go raibh trádmharc cláraithe ag Oifig na nOibreacha Poiblí faoi Acht na dTrádmharcanna 1996 [Trádmharc uimhir 217200 ó 13 Deireadh Fómhair 1999]

Ní dhéantar aon tagairt sna rialacháin reachtúla teanga [IR391 de 2008] do dhíolúine de chineál ar bith a bheith tugtha i gcás trádmharc cláraithe.

Tagraítear den difríocht idir trádmharc agus lógó in *Symonds Cider & English Wine Co. Ltd v. Showerings (Ireland) Ltd* [1997] 1 ILRM.

Feictear dom go bhfuil lógó agus ainm iomlán Oifig na nOibreacha Poiblí i mBéarla agus i nGaeilge cláraithe mar thrádmharc (ní mar lógó) ach ní chinntíonn an gníomh sin díolúine ós na rialacháin reachtúla teanga nuair nach bhforáiltear do dhíolúine i gcás trádmharcanna.

Ainm branda

Déantar an cás freisin gur ainm branda atá i lógó agus ainm iomlán Oifig na nOibreacha Poiblí i mBéarla agus i nGaeilge i dteannta a chéile.

Níor cuireadh aon fhaisnéise i láthair an imscrúdaithe a thacódh leis an dearcadh sin seachas a rá go raibh comhairle tugtha ina leith seo ag Oifig an Ard Aighne: “*Molann Oifig an Ard-Aighne freisin gur ‘Ainm-Branda’ an lógó – faoi mír (iii) den alt céanna dos na Rialacháin 2008*”.

I gcomhairle Oifig an Ard-Aighne ní dheirtear faoin “moladh” sin ach an méid seo; “*You could also say that it is a “BRAND NAME” – under par (iii). Logos and brand-names are no longer seen as confined to goods – they also apply to services.*”

Níl aon amhras ann ach go bhforáiltear do dhíolúine ós na rialacháin reachtúla teanga d’ainm branda. Glacann an t-imscrúdú leis freisin nach bhfuil aon amhras ann ach gur féidir le hainm branda tagairt do tháirgí nó do sheirbhísí.

Ach ní féidir liom géilleadh don teoiric gur “ainm branda” é an cumasc sin de shiombail gur léaráid phictiúrtha é i dteannta na ceannlitreacha OPW atá mar lógó agus ainm an chomhlachta poiblí i mBéarla agus i nGaeilge.

Ní chreidim go bhfuil aon duine ann a thagródh go fírinneach “d’ainm branda” an chomhlachta poiblí atá i gceist san imscrúdú seo mar “OPW, The Office of Public Works, Oifig na nOibreacha Poiblí.”

Mar argóint bhreise deirtear sa chomhairle sin “*It makes sense that the English appears first because it explains the initials OPW.*” Ní chreidim gur léirmhíniú dlíthiúil atá sa phointe seo agus ní thagraíonn sé don fhoráil i bhfo-alt 7 de na rialacháin reachtúla teanga “*go mbeidh an téacs i nGaeilge ann ar dtús.*”

Aonteangach

Dá nglacfaí le léirmhíniú Oifig na nOibreacha Poiblí gur cuid den lógó/ainm branda é ainm an chomhlachta poiblí sa chás seo bheadh de thoradh air sin go mbeadh díolúine ag ainm an chomhlachta poiblí ó na rialacháin reachtúla teanga agus níor ghá é a úsáid ach i dteanga amháin i stáiseanóireacht agus i gcomharthaíocht.

Ba leor a rá gur lógó/ainm branda é ainm aon chomhlachta poiblí agus soláthar aonteangach a dhéanamh ina leith. Ní chreidim go raibh sin ar intinn ag lucht déanta na rialacháin reachtúla seo ach gurbh é a mhalairt glan a bhí i gceist acu, a chinntiú go mbeadh feiceálacht na Gaeilge méadaithe in obair agus in íomhá chomhlachtaí poiblí na tíre.

Soiléir

Leagann na Rialacháin síos go soiléir cén bealach ar chóir caitheamh le hainm aon chomhlachta poiblí ar stáiseanóireacht nó ar chomharthaíocht.

Caithfear ainm an chomhlachta poiblí a chur ar fáil i nGaeilge **nó** go dátheangach. Más téacs dátheangach (seachas téacs i nGaeilge amháin) atá á úsáid bíonn feidhm leis na rialacha a leanas:

- Beidh an téacs i nGaeilge ann ar dtús.
- Beidh an téacs i nGaeilge chomh feiceálach, chomh sofheicthe agus chomh hinléite céanna leis an téacs i mBéarla.
- Ní bheidh na litreacha sa téacs i nGaeilge níos lú, ó thaobh méide de, ná na litreacha sa téacs i mBéarla.
- Maidir leis an téacs i nGaeilge, cuirfidh sé in iúl an fhaisnéis chéanna leis an bhfaisnéis a chuireann an téacs i mBéarla in iúl.
- Ní dhéanfar focal sa téacs i nGaeilge a ghiorrú mura bhfuil an focal sa téacs i mBéarla, ar aistriúchán air é, giorraithe freisin.

Trí ainm an chomhlachta poiblí a thabhairt i mBéarla ar dtús tá an fhoráil soiléir reachtúil seo á sarú sa chás seo.

Cé go bhfeicfeadh daoine áirithe é seo mar mhionphointe, tá tabhacht leis mar fhasach mar atá luaithe thuas agus le cinntiú nach ndéanfaí léirmhíniú míchruinn ar na diolúine a ceadaítear faoi na rialacháin leis an nGaeilge a fhágáil ar lár ar fad in ainmneacha chomhlachtaí poiblí.

Tá tábhacht eile leis – beidh, de bharr na gcúramaí atá ar an eagraíocht, an OPW freagrach as comharthaíocht a sholáthar do chuid mhór comhlachtaí poiblí ar fud na tíre agus tá sé tábhachtach go mbeadh léirmhíniú cruinn ar na forálacha reachtúla teanga ag an eagraíocht sin.

Agus fionnachtain á dhéanamh ag an imscrúdú seo go bhfuil sárú á dhéanamh ag Oifig na nOibreacha Poiblí ar na dualgais reachtúla teanga atá daingnithe i bhfo-ailt 7(1)(a) agus 7(2)(a) d'Ionstraim Reachtúil (I.R. Uimh. 391 de 2008) mar nach bhfuil an téacs i nGaeilge ann ar dtús in ainm an chomhlachta poiblí i gceannteidil stáiseanóireacht (ón 1 Márta 2011) agus i gcás comharthaíocht nua a shuítear in aon suíomh ón 1 Márta 2009, is ceart a bheith fíor-chúramach nach gcuirfear aon chostas breise ar an eagraíocht lena ngéilliúlacht don riachtanas reachtúil seo a chinntiú.

I bhfianaise an staid reatha eacnamaíochta beidh an t-imscrúdú seo ag moladh d'Oifig na nOibreacha Poiblí an stoc reatha de stáiseanóireacht atá ina seilbh a úsáid ar fad ar dtús agus na leasuithe maidir le tús áite a thabhairt don leagan Gaeilge d'ainm an chomhlachta poiblí a thabhairt i bhfeidhm in aon stoc nua nach bhfuil ordaithe nó i seilbh an chomhlachta poiblí faoi láthair.

Maidir le tús áite a thabhairt feasta d'úsáid an leagan Gaeilge d'ainm an chomhlachta poiblí i gcomharthaíocht nua a chuirfear in airde, arís molfar go ndéanfar sin ar bhealach stuama, tuisceanach a chinnteoidh nach mbeidh aon chostas suntasach breise i gceist don chomhlacht poiblí.

I ndeireadh an lae, is faoin gcomhlacht poiblí féin a bheidh sé an mionleasú seo a dhéanamh ar chostas ar bhonn nialasach.

Ní miste a lua freisin go bhfuil mionbhotún eile nár mhór a cheartú i stáiseanóireachta reatha Oifig na nOibreacha Poiblí. Tugtar seoladh oifigiúil an chomhlachta poiblí i nGaeilge mar “*Sráid Jonathan Swift Street*” in áit “*Sráid Jonathan Swift.*”

CAIBIDIL 4

Tuarascáil, Fionnachtana agus Moltaí

Tá dualgas orm mar Choimisinéir Teanga in aon chás ina seolaim imscrúdú faoi Acht na dTeangacha Oifigiúla tuarascáil i scríbhinn a ullmhú agus a chur faoi bhráid an chomhlachta poiblí lena mbaineann, faoi bhráid an Aire Gnóthaí Ealaíon, Oidhreacht agus Gaeltachta, agus i gcás ina ndéantar gearán liom, faoi bhráid an ghearánaigh, maidir le fionnachtana an imscrúdaithe agus féadaim aon mholtaí is cuí liom ag féachaint don imscrúdú a áireamh sa tuarascáil.

Fionnachtain an Imscrúdaithe

Is í seo a leanas fionnachtain an imscrúdaithe:

- Go bhfuil sárú á dhéanamh ag Oifig na nOibreacha Poiblí ar na dualgais reachtúla teanga atá daingnithe i bhfo-ailt 7(1)(a) agus 7(2)(a) d' Ionstraim Reachtúil (I.R. Uimh. 391 de 2008) – [Na Rialacháin um Acht an dTeangacha Oifigiúla 2003 (ALT 9) 2008] fad is a bhaineann sé leis an téacs i nGaeilge a bheith ann ar dtús i gceannteidil ar stáiseanóireacht an chomhlachta poiblí (ón 1 Márta 2011) agus i gcás comharthaíocht nua a shuítear in aon suíomh ón 1 Márta 2009.

Moltaí an Imscrúdaithe

Ag féachaint don imscrúdú, is iad seo a leanas na moltaí atá á ndéanamh agam mar Choimisinéir Teanga:

Stáiseanóireacht

- (1) Go leasóidh Oifig na nOibreacha Poiblí ceannteidil stáiseanóireacht na heagraíochta le cloí leis na forálacha atá daingnithe sna rialacháin reachtúla teanga faoi Alt 9 d' Acht na dTeangacha Oifigiúla trí ainm an chomhlachta poiblí a bheith ann ar dtús i nGaeilge.
- (2) Go leasóidh Oifig na nOibreacha Poiblí seoladh oifigiúil an chomhlachta poiblí i nGaeilge ó “*Sráid Jonathan Swift Street*” go “*Sráid Jonathan Swift*.”
- (3) Gan dochar don dualgas láithreach a bhfeictear don imscrúdú a bheith i gceist anseo, go dtabharfar faoin leasú seo a thabhairt i bhfeidhm nuair atá an chéad stoc eile de stáiseanóireacht á ordú ag an gcomhlacht poiblí le cinntiú go n-ídítear go cuí an stoc reatha stáiseanóireachta agus gur ar chostas ar bhonn nialasach a thabharfar an t-athrú i bhfeidhm.

Comharthaíocht

- (4) Go leasóidh Oifig na nOibreacha Poiblí an leagan amach atá ar aon chomharthaíocht nua a chuireann an comhlacht poiblí in airde nó a chuirtear in airde thar a cheann faoi réir na bhforálacha atá daingnithe sna rialacháin reachtúla teanga faoi Alt 9 d' Acht na dTeangacha Oifigiúla trí ainm an chomhlacht poiblí a bheith ann ar dtús i nGaeilge.
- (5) Gan dochar don dualgas láithreach a bhfeictear don imscrúdú a bheith i gceist anseo, go dtabharfar faoin leasú seo a thabhairt i bhfeidhm i gcás gach comhartha nua a chuireann an comhlacht poiblí in airde nó a chuirtear in airde thar a cheann ón 01 Lúnasa 2011 faoi réir na bhforálacha atá daingnithe sna rialacháin reachtúla teanga faoi Alt 9 d' Acht na dTeangacha Oifigiúla.
- (6) Gan dochar don dualgas a bhí i gceist i leith an ábhar seo ón 01 Márta 2009 nach rachfar i gcostas anois le leasuithe a dhéanamh ar na comharthaí sin a cuireadh in airde san idirlinn le cinntiú gur ar chostas ar bhonn nialasach a thabharfar an leasú i bhfeidhm feasta.

CAIBIDIL 5

Achomhairc chuig an Ard-Chúirt

Meabhraítear anseo go bhfuil sé de cheart ag páirtí in imscrúdú faoi Acht na dTeangacha Oifigiúla 2003, nó ag aon duine eile a ndéanann fionnachtana agus moltaí an Choimisinéara tar éis imscrúdaithe den sórt sin difear dó nó di, achomharc a dhéanamh chuig an Ard-Chúirt ar phonc dlí i gcoinne an chinnidh. Is ceart a thabhairt faoi deara gur gá achomharc a thionscnamh tráth nach déanaí ná 4 seachtaine tar éis fógra maidir leis na fionnachtana agus na moltaí iomchuí a thabhairt don duine a bheidh ag tionscnamh an achomhairc. Féach freisin I.R.14 de 2007.

Seo a leanas mar atá na forálacha sin d’Acht na dTeangacha Oifigiúla 2003:

Fo-alt 28(1)

Féadfaidh páirtí in imscrúdú faoin Acht seo nó aon duine eile a ndéanann fionnachtana agus moltaí an Choimisinéara tar éis imscrúdú den sórt sin difear dó nó di, achomharc a dhéanamh chuig an Ard-Chúirt ar phonc dlí i gcoinne an chinnidh.

Fo-alt 28(2)

Déanfar achomharc faoi fho-alt (1) a thionscnamh tráth nach déanaí ná 4 sheachtain tar éis fógra maidir leis na fionnachtana agus na moltaí iomchuí a thabhairt don duine a bheidh ag tionscnamh an achomhairc.

Fo-alt 28(3)(a)

I gcás ina ndéanfaidh an Ard-Chúirt achomharc faoin alt seo ag duine, seachas ag ceann, a dhíbhe, féadfaidh an Chúirt sin, má mheasann sí gur ghabh tábhacht phoiblí eisceachtúil leis an bponc dlí lena mbaineann, a ordú go ndéanfaidh an comhlacht poiblí lena mbaineann cuid de chostais an duine i ndáil leis an achomharc, nó iad go léir, a íoc.

Fo-alt 28(3)(b)

Féadfaidh an Ard-Chúirt a ordú go ndéanfaidh an comhlacht poiblí lena mbaineann cuid de chostais duine, seachas ceann, i ndáil le tarchur faoin alt seo, nó iad go léir, a íoc.

Fo-alt 28(4)

Maidir le cinneadh ón Ard-Chúirt tar éis achomhairc faoi fho-alt (1), sonrúfar ann, i gcás inar cuí sin, an tréimhse ar laistigh di a thabharfar éifeacht don chinneadh.

CAIBIDIL 6

Tuairimí á Lorg

Faoi fho-alt 26(4) d'Acht na dTeangacha Oifigiúla 2003, iarraim mar Choimisinéir Teanga ar Oifig na nOibreacha Poiblí aon tuairimí a bheadh aici, más ann dóibh, maidir le fionnachtana agus moltaí atá ar áireamh sa tuarascáil seo a chur faoi mo bhráid laistigh de thréimhse 6 seachtaine tar éis fógra maidir leis na fionnachtana agus na moltaí atá sa tuarascáil a bheith faighte ag Oifig na nOibreacha Poiblí.

Seán Ó Cuirreáin
An Coimisinéir Teanga

Dáta: _____

AGUISÍN B



Ceann Oifig
Sráid Jonathan Swift
Baile Átha Troim
Co. na Mí

Head Office
Jonathan Swift Street
Trim
Co Meath

Tell/Phone: (046) 942 6000
Facs/Fax: (046) 948 1793
Íosghlao/LoCall 1890 213414
Suíomh gréasáin/website: www.opw.ie

2 Deireadh Fómhair, 2012

Colm Ó Coisdealbha, Uas.
Bainisteoir Géilliúlachta
Oifig Choimisinéir na dTeangacha Oifigiúla
An Spidéal
Co. na Gaillimhe

A Chara,

Tagraím do do litir dár dáta 30 Lúnasa 2012 ag lorg cuntas ar na céimeanna a ghlac Oifig na nOibreacha chun moltaí an Choimisinéara Teanga óna Thuairisc a eisíodh ar 9 Meitheamh 2011 a chur i bhfeidhm.

Is iad seo a leanas moltaí na tuarascála sin:

Stáiseanáireacht

- (1) Go leasóidh Oifig na nOibreacha Poiblí ceannteidil stáiseanáireacht na heagraíochta le cloí leis na forálacha atá daingnithe sna rialacháin reachtúla teanga faoi Alt 9 d'Acht na dTeangacha Oifigiúla trí ainm an chomhlachta poiblí a bheith ann ar dtús i nGaeilge.
- (2) Go leasóidh Oifig na nOibreacha Poiblí seoladh oifigiúil an chomhlachta poiblí i nGaeilge ó "Sráid Jonathan Swift Street" go "Sráid Jonathan Swift."
- (3) Gan dochar don dualgas láithreach a bhfeictear don imscrúdú a bheith i gceist anseo, go dtabharfar faoin leasú seo a thabhairt i bhfeidhm nuair atá an chéad stoc eile de stáiseanáireacht á ordú ag an gcomhlacht poiblí le cinntiú go n-ídítear go cuí an stoc reatha stáiseanáireachta agus gur ar chostas ar bhonn nialasach a thabharfar an t-athrú i bhfeidhm.

Comharthaíocht

- (4) Go leasóidh Oifig na nOibreacha Poiblí an leagan amach atá ar aon chomharthaíocht nua a chuireann an comhlacht poiblí in airde nó a chuirtear in airde thar a cheann faoi réir na bhforálacha atá daingnithe sna rialacháin reachtúla teanga faoi Alt 9 d'Acht na dTeangacha Oifigiúla trí ainm an chomhlachta poiblí a bheith ann ar dtús i nGaeilge.
- (5) Gan dochar don dualgas láithreach a bhfeictear don imscrúdú a bheith i gceist anseo, go dtabharfar faoin leasú seo a thabhairt i bhfeidhm i gcás gach comhartha nua a chuireann an comhlacht poiblí in airde nó a chuirtear in airde thar a cheann ón 01 Lúnasa 2011 faoi réir na bhforálacha atá daingnithe sna rialacháin reachtúla teanga faoi Alt 9 d'Acht na dTeangacha Oifigiúla.
- (6) Gan dochar don dualgas a bhí i gceist i leith an ábhar seo ón 01 Márta 2009 nach rachfar i gcostas anois le leasuithe a dhéanamh ar na comharthaí sin a cuireadh in airde san idirlinn le cinntiú gur ar chostas ar bhonn nialasach a thabharfar an leasú i bhfeidhm feasta.


Maidir leis an moladh i mír (2) thuas, tá na botún maidir le ainm na sráide sé sin 'Sráid Jonathan Swift' ceartaithe againn – féach an stáiseanáireacht leis an litir seo,

Mar is eol duit is é a áitíonn an Oifig seo go bhfuil trí chuid d'ár lógó ina iomláin sé sin an triantán, na cinnlitreacha agus an teacs i gcló iodálach. Fritheadh comhairle ó Oifig an Ard-Aighne a n-aontaíonn leis an dtuairim sin. Aithníonn tuairisc an Choimisinéara 'go bhfuil lógó agus ainm iomlán Oifig na nOibreacha Poiblí i mBéarla agus i nGaeilge cláraithe mar thrádmharc (ní mar lógó) ach nach gcinntíonn an gníomh sin díolúine ós na rialacháin reachtúla teanga nuair nach bhforáiltear do dhíolúine i gcás trádmharcanna'. Scríobh Ard-Rúnaí na Roinne Ealíon, Oidhreacht agus Gaeltachta chugam i Mi na Samhain seo caite ag insint dom go bhfuil athbhreithniú ar Acht na dTeangacha Oifigiúla 2003 idir lámhe agus thug sé deis dom tuairimí Oifig n n-Oibreacha ina leith a chur ar aghaidh. Mar fhreagra ar an gcuireadh sin mhol mé sainmhíniú soiléir ar 'lógó' a thabhairt san reachtaíocht. Mhol mé freisin go mbeadh díolúine i gceist faoi Alt 9.1. (b) de IR 391 de 2008 do thrádmharcanna agus go h-áirithe trádmharcanna a chlárú roimh achtú Acht na dTeangacha Oifigiúla 2003. Táimid ag fanacht ar thoradh na h-athbhreithnithe sin.

Má tá toradh na h-athbhreithnithe i bhfabhar na moltaí atá déanta agam ní bheidh gá na moltaí eile i dtaobh ár lógó atá i dtuairisc an Choimisinéara a phlé arís.

Tá athbhreithniú idir lámh againn le tamall anuas maidir le comharthaíocht ag ár suíomhanna oidhreacht agus ár oifigí poiblí lena cinnitiú go bhfuil siad ag comhlíonadh forálacha Acht na dTeangacha Oifigiúla 2003.

Is mise le meas



Clare McGrath
Cathaoirleach